

En uigl cun economiesuisse

Ina grupp da lavur dad economiesuisse ha visità dus manaschis purils

DAD ANDREAS CADONAU/FMR

■ L'emna passada ha la grupp da lavur che sa fatschenta cun la politica agrara tar economiesuisse visità dus manaschis purils. A Grüşch tar il president da la Uniun purila grischuna Thomas Roffler ed a Donat tar il giuven pur Ursin Gustin è la delegaziun da la economia svizra sa confruntada cun l'agricultura grischuna da muntogna. «Nus vulain intervegnir da puras e purs tge che fatschenta els». Quai di il vicemanager da la partiziun per politica, economia e scolaziun tar economiesuisse, Roger Wehrli. El ha dacurt manà ina grupp da lavur da la federaziun tetgala da la economia svizra en il chantun Grischun, respectiv sin dus manaschis purils. «Nossa finamira è da visitar ina giada per onn in enfin dus manaschis en Svizra». La grupp da lavur che sa fatschenta cun politica agrara sa cumpona da represchentants da branschas en ina moda u l'otra colliadas cun l'agricultura.

Interpresas posiziunadas avant ni suenter la branscha agrara e consequentamain interessadas ed involvidas en las decisiuns che crodan a Berna e che pertutgan la politica agrara. Impurtant per Roger Wehrli è il discurs direct cun puras e purs per far stim e pledentar ils problems actuals. «Sa chapescha che nus avain en ina ni l'otra dumonda da la politica agrara differentas opiniuns». Per l'econom e viceparsura da la partiziun per politica, economia e scolaziun gida il contact direct a la tschertga da soluziuns ch'èn la finfinala supportablas



Il president da la Uniun purila grischuna, Thomas Roffler, (san.) ha preschentà ses manaschi e l'agricultura grischuna a la delegaziun dad economiesuisse. FOTO ANDREAS CADONAU

per omaduas varts. Roger Wehrli vul era tgirar il contact cun giuvens e giuvnas puras ed el senta là bler spiert innovativ. «Or da mia optica èsi impurtant da nastenschentar il spiert d'interprender da quels giuvens purs e dar spazi ad els da sa sviluppà.» Per Wehrli n'exista betg

ina suletta agricultura svizra. «Jau ves ina gronda varietad en quella sparta». Ed investa en las differentas spartas vul el porscher als commembers da la grupp da lavur. L'emna passada cun in viadi en il chantun Grischun ed uschia dattiers a l'agricultura da muntogna.

Tar il president da la Uniun purila grischuna

L'emprima fermada ha la represchentanza dad economiesuisse fatg sin il manaschi dal president da la Uniun purila grischuna, Thomas Roffler. Il manaschi che porscha lavur a Roffler, sia dunna Karin ed a ses figl sin intschess da la vischnanca da Grüşch sa chatta in zichel giud via uschia ch'ils navigaturs dals autos da la delegaziun dad economiesuisse han gi intgina fadia da localisar il manaschi. Roffler ha preschentà la atgna travaglia che sa deditgescha principalmain a la tratga da biestga ed a la produziun da latg. Il timun da la Uniun purila grischuna ha nizzegià la chaschun d'explitgar a la delegaziun da la economia svizra las impurtantas pitgas da l'agricultura da muntogna. E tar quellas impurtantas pitgas appartegn sa chapescha l'alpegiaziun.

Suenter la guidada tras il manaschi han l'apero ed in filmin davart l'alpegiaziun purschi la pussaivladad da sa brattar. L'interess da la delegaziun è sa drizzada a la situaziun economica dals manaschis. Ils discurs han tematisà las diversas iniziativas proximamain en votaziun che pertutgan l'agricultura ed èn sa fatschentads cun la rolla da la produziun ecologica en il Grischun, la valor da la vendita directa ed auter. La protecziun dal cunfin e cunvegnas da fiera libra procuran probabel per las pli intensivass discussiuns tranter l'uniun purila ed economiesuisse. Mancanza da temas nun è stada da constatar era betg tar il gentar comunabel avant che la delegaziun è sa messa sin viadi vers Donat per visitar il manaschi da Ursin e Martina Gustin.